

Bahan asal dari Arkib

Negara Malaysia

Lawatan PM dan Najib bawa tuah



DATUK NAJIB

Oleh ROSLAN BIAN

JERANTUT, Isnin — Lawatan Perdana Menteri, Datuk Seri Dr. Mahathir dan Datuk Najib Tun Razak ke Jerantut baru-baru ini disifatkan membawa tuah dan membantu calon-calon Barisan Nasional mencapai semua kejayaan dalam pilihanraya.

Perdana Menteri mengadakan lawatan serta merasmikan pelancaran bandar baru awal April lalu dan beliau berjaya meyakinkan penduduk di sini tentang landasan kepimpinan yang dibawa oleh Barisan Nasional.

Perdana Menteri mengingatkan rakyat supaya membuat satu penyusunan yang benar-benar dapat mencorakkan hidup rakyat di masa akan datang kerana rakyat mempunyai hak menentukannya.

Timbalan Menteri Kewangan serta Pengarah Pilihanraya Negeri, Datuk Najib pula berjaya memujuk pengaruh-pengaruh Pas supaya kembali menyokong Kerajaan Barisan Nasional.

Datuk Najib membongkar tujuan pakatan Pas dan DAP yang berhasrat untuk memecahkan politik orang-orang Melayu yang telah lama stabil di negara ini.

Semua calon Barisan Nasional yang berjaya mensifatkan kejayaan mereka adalah hasil lawatan yang ingin mewujudkan satu Kerajaan yang bersih, cekap dan amanah di negara ini.

Calon Parlimen, Encik Wan Bakar Wan Mohamed memberitahu, kejayaan cemerlang Barisan Nasional mengekalkan kesemua kerusi yang dipertandingkan, menunjukkan rakyat menyokong landasan perjuangan Barisan Nasional.

Wan Bakar berjaya mengalahkan calon Pas,

Syed Ibrahim dengan majoriti 7,803 mensifatkan kejayaannya adalah kejayaan rakyat di sini.

"Mereka telah membuat satu keputusan yang bijak sesuai seperti yang diminta oleh kedua pembesar tersebut semasa berucap di hari lawatan mereka," katanya.

Encik Ho Chock Keong, yang berjaya mengekalkan kedudukannya untuk penggal ketiga di kawasan bandar Jerantut yakin rakyat memahami apa yang diharapkan oleh kedua pemimpin semasa lawatan tersebut.

Katanya, Datuk Najib jelas menunjukkan iktidar yang bersungguh-sungguh untuk memastikan calon-calon Barisan Nasional yang bertanding berjaya di mana Datuk Najib telah mengadakan enam lawatan ke Jerantut dalam usaha membantu calon Barisan Nasional.

Encik Ho berazam ingin berusaha membalik kealahannya yang mungkin telah dilakukan memandangkan majoriti kemenangannya pada pilihanraya kali ini adalah merosot.

Katanya, lebih banyak projek pembangunan terutama kawasan luar bandar yang tertinggal akan diusahakan semula supaya rakyat dapat merasai nikmat dari Kerajaan yang mereka sokong selama ini.